

142 Rumantschs tar la confederaziun

Couchepin ha dasdà ils Rumantschs

■ **(anr/ld) L'infurmaziun davart l'identitad dals Rumantschs e da las Rumantschas tar la confederaziun n'è betg cuntentativa e transparenta. La culpa è per part l'«Annuari federal» (Staatskalender), da l'autra vart ils Rumantschs sez.** En connex cun l'elecziun da la nova vicechanceliera da la confederaziun, *Corina Casanova*, e dal nov vicechancelier e pledader dal cussegl federal, *Oswald Sigg*, ha cusseglier federal *Pascal Couchepin* criticità il proceder. Las propostas al cussegl federal sajan stadas mal preparadas da la responsabla da la chancelleria federala, *Annemarie Huber-Hotz* che maina il post da stab da la regenza. En la gasetta «Le Matin dimanche» dal 1. da matg 2005 criticgescha Couchepin tranter auter l'appartegnientscha linguistica sco suonda: «Mme Casanova est une per-

sonnalité de qualité. Mais elle est identifiée comme Alémanique dans l'annuaire fédéral».

Formalmain ha Couchepin (el sa che *Corina Casanova* è d'origin rumantscha) raschun. Dentant en l'actual Annuari federal – ch'el citescha – èsi inditgà tar *Corina Casanova* sut lingua in «d», quai vul dir «deutsch». L'anr ha sfoglià en quest Annuari, ma n'ha chattà nagins «Rumantschs» en l'index alfabetic dals nums dals funcziunaris federali. Pli baud pudevan ils Rumantschs pretender l'indicaziun da lur linguatg mamma, che vegniva alura inditgà cun «r» u «d/r». Quai para dentant d'esser vegnì ord moda.

Sco quai che l'Uffizi federal da personal ha confermà a l'Agentura da novitads rumantscha (anr) occupa la confederaziun 142 Rumantschas e Rumantschs u 0,4%

dal personal. Tar la dumbraziun dal pievel l'onn 2000 avevan 0,5% inditgà il rumantsch sco linguatg principal.

Ins na dastga dentant betg pledar tar la confederaziun d'ina naziun da quatter linguas, renonuscher dentant be trais en publicaziuns uffizialas. Igl è inadmissibel che las collavuraturas ed ils collavuratur rumantschs vegnan simplamain considerads sco tals da linguatg tudestg. Quella critica en connex cun l'elecziun pudess esser ina chaschun da procurar per ina meglra trasparenza linguistica per las collavuraturas ed ils collavuratur rumantschs da la confederaziun. Forsa stuessan ils Rumantschs sez purtar lur identitad rumantscha pli avertamain. En quest senn ha cusseglier federal Couchepin dasdà in zic ils Rumantschs.